



SLUŽBA ZA REVIZIJU FINANSIJSKOG POSLOVANJA

Na osnovu člana 14. stav (1) Zakona o finansiranju političkih stranaka («Službeni glasnik BiH» broj 22/00 i 102/09), člana 24. Pravilnika o godišnjim finansijskim izvještajima političkih stranaka («Službeni glasnik BiH» broj 61/06), a u skladu sa članom 12. Pravilnika o administrativnim procedurama pregleda, kontrole i revizije finansijskih izvještaja političkih stranaka («Službeni glasnik BiH» broj 103/08), izdajem

IZVJEŠTAJ O PREGLEDU GODIŠNJEG FINANSIJSKOG IZVJEŠTAJA ZA 2008. GODINU HRVATSKE NARODNE ZAJEDNICE

Broj: 03-07-6-1375/09
Sarajevo, 20. aprila 2010. godine

SADRŽAJ:

| | |
|---|---|
| MIŠLJENJE REVIZORA | 3 |
| 1. UVOD | 4 |
| 2. PREDSTAVLJANJE POLITIČKE STRANKE | 4 |
| 3. OPIS PREGLEDA I KONTROLE FINANSIJSKOG IZVJEŠTAJA | 5 |
| Predmet pregleda i kontrole | 5 |
| Cilj pregleda i kontrole | 5 |
| Obim pregleda i kontrole | 5 |
| 4. PRETHODNE REVIZIJE | 5 |
| 5. NALAZI I PREPORUKE | 5 |
| 5.1. NALAZI | 5 |
| 5.2. PREPORUKE | 7 |

MIŠLJENJE REVIZORA

Služba za reviziju finansijskog poslovanja u Centralnoj izbornoj komisiji Bosne i Hercegovine izvršila je pregled finansijskih izvještaja Hrvatske narodne zajednice i to: godišnjeg finansijskog izvještaja za 2008. godinu i finansijskog izvještaja za period od dana podnošenja prijave za ovjeru za izbore do dana ovjere rezultata Lokalnih izbora, održanih u oktobru 2008. godine.

Rukovodstvo stranke je odgovorno za finansijske izvještaje, postupanje stranke u skladu sa Zakonom o finansiranju političkih stranaka i članom 15.10 Izbornog zakona BiH i uspostavljanje efikasnog sistema internih kontrola.

Pregled smo obavili u skladu sa revizijskim standardima primjenjivim na angažmanu u pregledu. Ovi standardi zahtijevaju da planiramo i izvršimo pregled da bi dobili umjerenu pouzdanost da stranka nije značajno kršila odredbe Zakona o finansiranju političkih stranaka.

Pregled je ograničen na kontrolu godišnjeg finansijskog izvještaja političke stranke i primjenu analitičkih procedura na podacima iz finansijskih izvještaja, pa prema tome ne obezbjeđuju pouzdanost koja bi se dobila izvršenom revizijom u prostorijama stranke.

Na osnovu našeg pregleda utvrđeno je sljedeće:

- 1. Hrvatska narodna zajednica je prekršila odredbe člana 3. stav (1) Zakona o finansiranju političkih stranaka.**
- 2. Stranka je prekršila odredbe člana 11. stav (1) i stav (3) Zakona o finansiranju političkih stranaka jer nije vodila evidencije o svojim prihodima i rashodima i obrasce godišnjeg finansijskog izvještaja nije popunila u skladu sa Pravilnikom o godišnjim finansijskim izvještajima političkih stranaka.**

Na osnovu našeg pregleda, odnosno kontrole finansijskog izvještaja, osim gornjih napomena pod 1. i 2., nismo zapazili ništa značajno što bi ukazalo na nedostatke u finansijskom izvještaju ili na finansiranje ove političke stranke suprotno odredbama Zakona o finansiranju političkih stranaka i člana 15.10 Izbornog zakona BiH.

1. UVOD

Služba za reviziju finansijskog poslovanja u Centralnoj izbornoj komisiji BiH (u daljem tekstu: Služba za reviziju) je izvršila pregled finansijskih izvještaja Hrvatske narodne zajednice i to: godišnjeg finansijskog izvještaja za 2008. godinu i finansijskog izvještaja za period od dana podnošenja prijave za ovjeru za izbore do dana ovjere rezultata Lokalnih izbora, održanih u oktobru 2008. godine.

Pregled i kontrola finansijskog izvještaja su provedeni u skladu sa članom 25. Pravilnika o godišnjim finansijskim izvještajima političkih stranaka i članom 2. Pravilnika o administrativnim procedurama pregleda, kontrole i revizije finansijskih izvještaja političkih stranaka.

Zbog činjenice da nije obavljena revizija u prostorijama političke stranke, postoji mogućnost da pojedine materijalno značajne greške ne budu otkrivene.

Prema podacima iz godišnjeg finansijskog izvještaja Hrvatska narodna zajednica je iskazala prihode u iznosu od 83.648,39 KM, čija struktura je data u sljedećoj tabeli¹:

| Red. br. | Vrsta prihoda | Iznos u KM | Učešće u uk. prihodu % |
|----------|-------------------------|------------------|------------------------|
| 1 | Članarina | 0,00 | 0,00% |
| 2 | Prilozi fizičkih lica | 0,00 | 0,00% |
| 3 | Prilozi pravnih lica | 0,00 | 0,00% |
| 4 | Prihodi od imovine | 839,49 | 1,00% |
| 5 | Prihodi od pravnih lica | 0,00 | 0,00% |
| 6 | Prihodi od poklona | 0,00 | 0,00% |
| 7 | Prihodi iz budžeta | 82.418,90 | 98,53% |
| | Ostali prihodi | 390,00 | 0,47% |
| | Ukupni prihodi: | 83.648,39 | 100,00% |

U godišnjem finansijskom izvještaju Hrvatska narodna zajednica je iskazala ukupne rashode u iznosu 111.374,95 KM.

2. PREDSTAVLJANJE POLITIČKE STRANKE

Naziv političke stranke: Hrvatska narodna zajednica. Skraćeni naziv stranke je HNZ.

Hrvatska narodna zajednica je dana 05.09.1998. godine registrovana u Kantonalnom sudu u Sarajevu pod brojem RI-6/98.

Sjedište političke stranke je u Sarajevu, ulica Titova 9a.

Za zastupanje stranke ovlašten je prof.dr. Milenko Brkić, predsjednik.

Lice ovlašteno za podnošenje finansijskih izvještaja za 2008. godinu je Bernarda Nosse.

Prema podacima iz godišnjeg finansijskog izvještaja za 2008. godinu, Hrvatska narodna zajednica ima sljedeće organizacione dijelove:

- Središnjica HNZ Sarajevo,
- 3 kantonalna odbora,
- 2 gradska odbora, i
- 3 općinska odbora.

¹ Podaci sa obrasca 3 godišnjeg finansijskog izvještaja za 2008. godinu, koji je dostavljen 17.03.2010. godine.

3. OPIS PREGLEDA I KONTROLE FINANSIJSKOG IZVJEŠTAJA

Predmet pregleda i kontrole je godišnji finansijski izvještaj Hrvatske narodne zajednice za 2008. godinu i finansijski izvještaj za period od dana podnošenja prijave za ovjeru za izbore do dana ovjere rezultata Lokalnih izbora održanih u oktobru 2008. godine.

Cilj pregleda i kontrole je da revizor na bazi finansijskog izvještaja pokuša da ustanovi da li je politička stranka u izvještajnom periodu postupala u skladu sa odredbama Zakona o finansiranju političkih stranaka i odredbama člana 15.10 Izbornog zakona BiH. Ukoliko revizor na bazi kontrole finansijskog izvještaja utvrdi određena kršenja navedenih zakona, ocjenjuje da li je potrebno izvršiti terensku reviziju da bi mogao izraziti mišljenje o tome da li se stranka finansirala u skladu sa Zakonom o finansiranju političkih stranaka i da li su troškovi predizborne kampanje u okviru zakonom dozvoljenih.

Obim pregleda i kontrole finansijskih izvještaja Hrvatske narodne zajednice obuhvata kontrolu i provođenje analitičkih procedura radi utvrđivanja usklađenosti podataka koje je stranka iskazala u finansijskom izvještaju sa odredbama Zakona o finansiranju političkih stranaka, odnosno usklađenosti izvora finansiranja i načina trošenja sredstava.

4. PRETHODNE REVIZIJE

U prethodnom periodu Služba za reviziju je izvršila pregled godišnjih finansijskih izvještaja Hrvatske narodne zajednice za 2005. i 2006. godinu, nakon kojih su izdati izvještaji o pregledu sa mišljenjem revizora, nalazima i preporukama revizije. Takođe, Služba za reviziju je obavila reviziju godišnjeg finansijskog izvještaja Hrvatske narodne zajednice za 2007. godinu i izdala izvještaj o reviziji sa mišljenjem da stranka nije postupala u skladu sa odredbama člana 8. stav (1) i člana 11. stav (1) i stav (3) Zakona o finansiranju političkih stranaka.

Nerealizovane preporuke

Na osnovu uočenih nedostataka u godišnjem finansijskom izvještaju za 2008. godinu, utvrđeno je da politička stranka nije ispoštovala sve preporuke koje su date u izvještaju o reviziji godišnjeg finansijskog izvještaja za 2007. godinu. Stranka nije evidentirala sve rashode i nije godišnji finansijski izvještaj za 2008. godinu popunila u skladu sa Pravilnikom o godišnjim finansijskim izvještajima političkih stranaka.

5. NALAZI I PREPORUKE

5.1. NALAZI

- a) **Na osnovu obavljene revizije utvrđeno je da je stranka postupala suprotno odredbama člana 3. stav (1)² Zakona o finansiranju političkih stranaka.**

HNZ-GO Banja Luka je u 2008. godini iznajmio prostor koji nije u vlasništvu stranke i na taj način ostvario prihode u iznosu od 200,00 KM. Naime, Hrvatska narodna zajednica je od Udruge Hrvatski radiša Banja Luka, dana 16.12.2008. godine, naplatila korištenje prostora za novembar i decembar 2008. godine. Imajući u vidu da je stranka ostvarila prihod od imovine koja nije u

² Politička stranka može osigurati sredstva iz: a) članarina; b) priloga pravnih i fizičkih lica; c) prihoda od imovine u vlasništvu stranke; d) budžeta BiH za finansiranje parlamentarnih grupa u skladu s članom 10. Zakona o finansiranju političkih stranaka, kao i iz entitetskih budžeta i svih njihovih nižih organizacionih jedinica u skladu s entitetskim zakonima; e) dobiti od prihoda preduzeća u vlasništvu političke stranke.

njenom vlasništvu, odnosno koja je pod zakupom prekršene su odredbe člana 3. stav (1) Zakona o finansiranju političkih stranaka.

b) Hrvatska narodna zajednica je prekršila odredbe člana 11. stav (1) i stav (3) Zakona o finansiranju političkih stranaka.

Služba za reviziju je izvršila kontrolu godišnjeg finansijskog izvještaja Hrvatske narodne zajednice za 2008. godinu i utvrdila da su prekršene odredbe člana 11. stav (1) i stav (3) Zakona o finansiranju političkih stranaka.

HNZ nije u godišnjem finansijskom izvještaju za 2008. godinu iskazala transakcijske račune broj: 3381102200631839³ i 338670220088027⁴ kod Unicredit banke, čime je postupila suprotno odredbama člana 11. Pravilnika o godišnjim finansijskim izvještajima političkih stranaka.

Stranka je prekršila odredbe člana 20. i 21. Pravilnika o godišnjim finansijskim izvještajima političkih stranaka jer nije u obrascu režijsko-administrativnih i ostalih troškova Središnjice HNZ Sarajevo iskazala sve troškove električne energije, vode i telefona, čime je iskazala i ukupne rashode u manjem iznosu od stvarnih. Osim ovih troškova, stranka nije iskazala ni troškove zakupnine za poslovne prostorije koje koristi Središnjica HNZ Sarajevo u iznosu od 458,00 KM.

Služba za reviziju je izvršila uvid u poslovne knjige Središnjice HNZ Sarajevo i utvrdila da ovi troškovi nisu evidentirani ni u poslovnim knjigama u 2008. godini, što nije u skladu sa članom 11. stav (1) Zakona o finansiranju političkih stranaka.

Hrvatska narodna zajednica nije popunila obrazac pozajmica, kredita i dugova u skladu sa odredbama člana 23. Pravilnika o godišnjim finansijskim izvještajima političkih stranaka. Na osnovu obavljenog pregleda utvrđeno je da stranka u obrascu 5 godišnjeg finansijskog izvještaja nije iskazala obaveze prema dobavljačima po osnovu režijskih troškova Središnjice HNZ.

Troškovi predizborne kampanje

Hrvatska narodna zajednica je postupila u skladu sa članom 15.10 Izbornog zakona BiH, odnosno u svrhu predizborne kampanje je potrošila 36.798,78 KM.

Prema odredbama člana 15.10 Izbornog zakona BiH politička stranka za potrebe izborne kampanje ne smije potrošiti više od 0,30 odnosno 0,20 KM⁵ po biraču u svakom izbornom krugu, prema broju birača koje je objavila Centralna izborna komisija BiH. Prema podacima Centralne izborne komisije BiH, Hrvatska narodna zajednica je u svrhu izborne kampanje mogla da potroši 93.444,90 KM.

³ Stranka putem ovog računa nije imala transakcije u 2008. godini.

⁴ Stranka je dostavila potvrdu banke da putem ovog računa nije bilo transakcija u 2009. godini, i da je stanje računa nula, dok podatke o prometu računa u 2008. godini stranka nije dostavila.

⁵ Član 15.10 stav 2. propisuje da se maksimalno dozvoljeni iznos za finansiranje izborne kampanje izračunava tako što se broj glasača u svim izbornim jedinicama u kojima politički subjekt ima kandidatsku listu ili kandidata pomnoži sa: 30 feninga za načelnika opštine odnosno gradonačelnika i za članove skupštine opštine, članove Narodne skupštine RS i Predstavničkog doma Parlamenta Federacije BiH, članove Parlamentarne skupštine BiH, člana Predsjedništva BiH, i predsjednika i potpredsjednike RS, odnosno 20 feninga za izbore za članove kantonalnih skupština.

5.2. PREPORUKE

Preporučuje se Hrvatskoj narodnoj zajednici da se pridržava odredaba Zakona o finansiranju političkih stranaka, a posebno na osnovu uočenih nedostataka se preporučuje:

- *da postupa u skladu sa odredbama člana 3. stav (1) i člana 11. stav (1) i stav (3) Zakona o finansiranju političkih stranaka, odnosno*
 - *da svoje finansiranje svede u zakonom propisani okvir,*
 - *da vodi evidencije o svojim prihodima i rashodima i*
 - *da finansijske izvještaje koje podnosi Centralnoj izbornoj komisiji BiH sačinjava u skladu sa Pravilnikom o godišnjim finansijskim izvještajima političkih stranaka.*

KOMENTAR:

U ostavljenom roku Hrvatska narodna zajednica je dostavila očitovanje na Preliminarni izvještaj o pregledu godišnjeg finansijskog izvještaja za 2008. godine. Stranka je u očitovanju dala obrazloženje za nepravilnosti koje su utvrđene u Preliminarnom izvještaju o pregledu i navela da će ubuduće u finansijskom izvještaju iskazivati sve transakcijske račune koji su otvoreni, bez obzira da li je putem tih računa ostvaren promet tokom godine. Uz očitovanje stranka je dostavila i ispravljene obrasce postizbornog finansijskog izvještaja, što je Služba za reviziju uvažila i ugradila u Izvještaj o pregledu godišnjeg finansijskog izvještaja za 2008. godine. Služba za reviziju nije uvažila primjedbu stranke koja se odnosila na nalaz kojim je utvrđeno da je stranka prekršila odredbe člana 3. stav (1) Zakona o finansiranju političkih stranaka.

Hasida Gušić, šef Službe za reviziju

Sanja Čabrilo, revizor

Željko Bakalar, pomoćnik revizora